

“نُصُّ الطَّرِيقِ”

" دائماً باعاند في السبق "

دائماً باعاند في السبق
وباميل على كتف الزمن عند الوصول
باسرق خضار ورق الشجر
وبالم تاني فزرعة المحصول
ودي مش أصول في اللعبة دي؛ لأ دي حرفة
علشان باخلي الحظ يمشي فبعد يبجي 200 سنة ويقول آمين
وانا مش حزين
أنا كنت لابس فوق ملاحى خفيف
عربيتي توب الذكرى وبقيت مُنكَمَش
لحظة وصولي للسما
وناولت قلبي لربنا قام قال لي سير
فازاي أسير يا رب
وانا مش أسير؟!

علشان أخش في حرب واخرج منتصر

يا رب ضاقت والنبى

اقبل لي آخر مطلبي

واوهد لي مرة فكل عُسر يسير

خليني ادوق طعمي الجديد في الخير

واسمح لي مرة أكلمك

أنا بس طالب أختصر مُر الطريق

اوهد لي سكة أخشها واكسب صديق

يعرفني وقت ما احن له

مش بس وقت المصلحة

العمر مشرط هَدّني

وحدفني جَوَّ المشرحة

يا رب

اوهد لي سكة جديدة من نوعها

تلازمني وقت ما اخدني وأروحها

أولما اطبطب ع الرصيف
علشان يساعني ف قعدتي وما يخنلش
لِسَّاني واقف باخُنُق الأيام بإيدي
كَسَرني شكل الحُزن في وريدي
فسألت نفسي ازاى هاطير من غير جناح
وانا مش ملاك يا رب
ولا إيدي شائلة في جوفها ميت مليون سلاح علشان أسير
واعزف لي لحن أوقات يشبه وحدتي ساعة الغياب
أول ما أبص لفوق قوي
فالاقيني ضهري بينحني
وملامي وقت الضعف صارت تختفي وتغيب بعيد
أصبحت باشبه للضباب على كتف شباك الهوا
يا رب محتاج الدوا
الحقني بيه
واهدي لي فكرة عِندي للأيام لُقا

وانصُب لي فكرة جديدة ماشية على الصراط
تبعدني عن كل الحصاد
وتدِل روعي على العمل من غير عناد
ساعة ما أبص لبكرة جاي يدوس بإيدي على الزناد
واقتل حمامة فكل مرة بتيجي وتقول لي انتهيت
وانا فيَّ روح
والنبض مليون بالجروح
مع إنه شغال ما انتهاش
وانا لسا واقف بابتسم
وباقول لي عاش
على كل خطوة بامسها بعند الطريق
وما زلت باعند في السبق
واكسب صديق

